



# Tir Yimiyim

www.tirymiyim.in

Regd. No. RNI. NAGAAO/2004/13113. Postal-NE/RN-717.

e-mail : tirymiyim@gmail.com

TAPAK 8

Yangia anidakangma :

f Tir Yimiyim

Instagram tirymiyim@aolima

YouTube tir yimiyim

TAPAK 10

"China nunger phone tamshi": Lithuania

IPL 2021: KL Rahul-i alizung tasen ka tongtet



VOL. XVIII NO. 341 (ADOK 341) DIMAPUR

YANGTEPNÜ (THURSDAY)

RONGJUI (SEPTEMBER) 23, 2021 ₹ 5.00

## Core Committee-i NSCN(IM) den ajurutept

**Kohima, September 22:** Bodbarnü Core Committee on Naga Political Issue-i Dimapur nung NSCN (IM) general secretary Th. Muivah aser tanga ketdangsürtem den ajuruteptogo.

"Nagaland Chief Minister Neiphiu Rio convener ser Core Committee-i Chumukedima Police Complex nung Th Muivah den ajurutept" ta Planning and Coordination, Land Revenue and Parliamentary Affairs Minister, Neiba Kronu-i ashi.

Iba senden nung Deputy Chief Minister Y Patton aser Leader of NPF Legislature Party T R Zeliang na den MLA tem aden.

Senden nung NSCN(IM) aser Centre-i Interlocutor tasen shimba AK Mishra tsungda olemtept tenzükba atema pelaba metetdaksü, ta Minister Kronu-i ashi.

Core Committee-isa NSCN(IM) ketdangsürtem dang Naga nungeri aginüba ama tekaratiba nung Naga yimten teblemsü atema telemtepta ka agitsü nendaka inyaksü mepishi, ta paisa metetdaksü.

Core Committee-i Naga National Political Groups indang Working Committee den ajuruteptsü sentong lir mali ta asungdangdang "ibaji taruba CCNPI senden nung lemtetsü" ta Kronu-i langzü.

## Kohima nung New India@75 campaign agir

**Dimapur, September 22, 2021 (TYO):** September 22, 2021 nü Kohima nung aiba school aser college nung HIV & AIDS, TB aser Blood Donation indang sentong ka agiogo.

Iba sentong National AIDS Control Organisation, Ministry of H&FW, Gol ajanga ayongzüka agir aser tanü Alder College nung awareness programme ka aser Model Hr. Sec. School nung online ajanga sentong agia laisü.

Iba sentong nung shisalen sayurtemji- Dr. Akaba Jamir District TB Officer Kohima; Sentimongla Tsudir District Program Officer District AIDS Prevention & Control Unit (DAPCU) Kohima; Bendang Imsong Chairman VBDA Kohima & Coordinator (Nagaland & Arunachal Pradesh), Kripa foundation; Dr. Kezhasing Meru

Dr. Medical Officer DoTs Plus site aser Alipoker Director NSACS & Executive Member VBDA Kohima nungertem lir.

New India@75 Awareness Campaign indang mezüngbuba shilem nung HIV, Blood Donation aser TB nung ajemdaker kaketshirtem atema online tetoktepbatem agitsü.

Tetoktepta balala agütsütsü atema tatebangba anogoji September 20, 2021 lir. Iba dak sendakba osang tejangja metenürtemi tongteprateptsü atema:

Sentimongla Tzudir, District Program Officer, District AIDS Prevention and Control Unit & Convenor, Sub Committee for online competitions, New India @ 75.

Ph no.:9856890583. Email: dapcukohima@gmail.com.

## World Rhino Day nung güntok tezü 2,479 rongdokogo



September 22, 2021 nü Assam kübok Bokakhat nung güntok tezütem rongdokdang agiba noksa angur.

**Guwahati, September 22, 2021 (Agencies):** Assam sorkari Bodbarnü World Rhino Day nung güntok tezü 2,479 mi agi rongdokogo.

Golaghat district kübok Bokakhat playground nung mimong tululu trok tashi yanglur tanü güntok tezütem rongdok.

Güntok tezü ya mozü yangludang amshir ta asubaji tai ta osang prokshitsü aser güntok shikariba anendaksütsü atema World Rhino Day nung güntok tezütem rongdoktsü telemtepta agi.

"Tanü ya Assam aser India atema otsütsü anogo ka lir. Asenoki güntok tezü 2479 rongdokogo aser iba ya alima nung tang mezüng inyaker. Prime Minister Narendra Modi-i Assam nung shikariba anentsü alizung ayuba nung iba ya shilem ka lir" ta Assam CM Sarma-i ashi.

"Tezü ka aliba güntok ya asen loktiliba asoshi tongtipang shilem ka dang masü, saka asen senmang aser maitsü atema nungshi ka lir. Kaziranga National Park nung museum ka yanglutsü aser idakji güntok tezü 94 ayutsü. Güntok tezü

ya mozü yangludang amshir ta asüba ya tiyazü lir" ta paisa metetdaksü.

"Iba ya tezü ka dang aliba güntok indang tezü yimjak nung raksaa endokba mapa tulutiba lir. Güntok tezü nung mozü kecha mali ta asüba kuli sayutsü atema iba sentong agir" ta Assam Forest Minister Parimal Suklabaidya-ia ashi.

"Barpeta, Morigan, Barpeta, Mangaldoi, Tezpur Nagaon, BTR, Golaghat aser Kohora nung yua aliba tezütem Bokakhat treasury-i bener aru" ta Principal Chief Conservator of Forest and HoF, Assam, M K Yadava-ia ashi.

September 16, 2021 nü Assam sorkari state treasury tem nung yua aliba güntok tezü 2,623 nungi 2,479 rongdoktsü telemtepta agia liasü.

Assam nung ozüing alema güntok kanga shikariba sülen 1975 küm 'endangered' ta sangdonga liasü.

Alima nung tezü ka dang aliba güntok teimtibaji Assam nung lir. Güntokji Manas National Park, Orang National Parks aser Kaziranga National Park nung lir.

## RN Ravi-i Interlocutor mapa nungi sodi agiogo

**New Delhi, September 22, 2021 (Agencies):** Taoba Nagaland Governor RN Ravi-i Naga yimjung olemtept atema interlocutor mapa nungi anenba shidi agütsüogo.

Centre sorkari Ravi-i züluba shidi agizükogo, ta MHA spokesperson kati metetdaksü.

Centre-i National Socialist Council of Nagaland-Isak-Muivah (NSCN I-M) den olemtept tenzükba sülen anogo ka lir RN Ravi-i tanü interlocutor mapa nungi anen.

Iba ajanga Centre-i interlocutor tasen ka shimtsü atema lenmang lapoktsür.

Hopta ana tejaklen Ravi ya Tamil Nadu Governor inyaksü belena liasü saka pai interlocutor mapa metoktsü dang aru.

Taoba Intelligence Bureau (IB) Special Director Akshaya Kumar Mishra-i yashi Dimapur nung NSCN (IM) den jembishinü tenzükogo. April 2021 nung Mishra-i mapa nungi sodi anguba sülen Northeast dak sendakba onüktem atema Union Home Ministry indang advisor ka ama inyaka arur.

Mishra ya Rajasthan cadre nungi 1987 batch former IPS ketdangsür ka lir.

"NSCN tanishir Thuingaleng Muivah aser Ravi na tesentaktept mejungi akümba sülen Mishra-i



RN Ravi (File photo)

NSCN den jembia arur" ta Union Home Ministry ketdangsür kati ashi.

Mishra-i mapa inyaka aruba ajanga taoba ita ishika tsungda Ministry-i NSCN den yimjung tenangzüktept aser Assam kübok Karbi-Anglong district nung telungpur telok 5 den accord nung sign sütetogo, ta paisa ashi.

"Item ya Ministry-i inyaktetba mapa tulutem lir aser Centre o Naga telungpur teloktem tsungda tekong merangtepta angateteptsü imlar" ta ketdangsürisa metetdaksü.

NSCN (IM) aser Ravi tsungda tesüsabuba olemteptji January 2020 nung liasü. Iba sülen yaküm August ita New Delhi nung khen ajurutept.

2015 küm Prime Minister Narendra Modi lia Issak Chishi

Swu aser Thuingaleng Muivah den sign asüba framework agreement Ravi-i yanglushir prokshi ta tai tongloktsüba sülen mangatettept adok.

Iba den külemi Ravi aser NSCN (IM) tsungda kanga mejungi o toktept aser iba atema Home Minister Amit Shah-i taoba Assam Finance Minister Himanta Biswa Sarma, Nagaland Chief Minister Neiphiu Rio aser Naga social activist ka nem Delhi nung Muivah den ajurutepta angateteptsü atema mapa lemzükjia liasü.

NSCN (IM)-i memolungka Centre sorkari 2019 küm Ravi nem Nagaland Governor inyaksü mapa lemzüksü.

NSCN(I-M)-i Governor aser peace talks interlocutor mapatem nungi Ravi agientsü atema takhangba agüja aruba sülen September 9, 2021 nü pa Tamil Nadu nung Governor inyaksü mapa belena liasü.

"R.N. Ravi-i Naga yimjung olemtept atema interlocutor mapa nungi anenba shidi tanü agütsüogo aser ibaji India sorkari agizükogo" ta Ministry of Home Affairs (MHA)-i metetdaksü.

Taoba Intelligence Bureau special director Akshay Mishra-i Ravi melenzüktsü ta osang ajanga ashi.

## COVID-19 Nagaland: 35 taneptsü angu, 31 dak putet & 1 asü

**Kohima, September 22, 2021 (TYO):** Bodbarnü Nagaland nung nisung 31 dak COVID-19 aliba putet aser 35 taneptsü angu.

"Tesüiba ghonda 24 tsungda nisung 31 dak COVID-19 aliba putet. Parnokji Dimapur nung 19, Mokokchung nung 5, Kohima o Phek nung asemsem (3) aser Peren nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 35 tashi taneptsü angu. Parnokji Mokokchung nung 14, Kohima nung 11, Dimapur nung 7,

Kiphire nung 2 aser Phek nung 1 lir" ta paisa ashi.

Nisung 30,990 nungi 28,913 taneptsü nguogo aser ibaji 93.29% lir, ta Dr Kikon-isa ashi.

Tang nisung 459 anepaludar saka parnok rongnung nisung 356 dakbo shirangba yimya mali, ta paisa shisem.

Bodbarnü Dimapur nung COVID-19 puteta alir ka asü aser iba nisung züngsema tasür ajak agi 658 kümogo, saka parnok 15 dakbo tanga tashidak liasü, ta Dr Kikon-isa metetdaksü.

"Mongulbar tashi nung nisung 679,827 nem COVID-19 vaccine indang dose 992,485

agütsüogo" ta State Immunization Officer, Dr Ritu Thurr-ia ashi.

"Vaccine agirtem rongnung frontline workers 60,915, healthcare workers 15,994, arishi küm 45 ser tempur 196,702 aser arishi küm 18 nungi 44 tsungda alir 406,216 lir" ta paisa ashi.

"Vaccine agirtem rongnungi nisung 312,658-i dose anaprong agiogo. Parnokji frontline workers 46,955, healthcare workers 13,209, arishi küm 45 ser tempur 129,667 aser arishi küm 18 nungi 44 tsungda alir 122,827 lir" ta Dr Thurr-isa ashi.

## Covid agi asür shia nem state sorkari Rs 50,000 teyari agütsütsü

**New Delhi, September 22, 2021 (Agencies):** Covid ajanga asüba kibong shia nem state sorkari Rs 50,000 agütsütsü ta Bodbarnü Centre-i Supreme Court dang shiogo.

Senji taoba mapang Covid ajanga asürtem nem dang masü saka tarutsü nung asür kibongtem nem-a agütsütsü ta Centre-i ashi.

State sorkartemi pei pei Disaster Response funds nungi teyari agütsütsü aser senji District Disaster Management Authority mesüra district

administration ajanga agütsütsü, ta Centre-i SC dang ashi.

January 2020 nung India nung COVID-19 wara adokba sülen nisung lakh 1.45 tema COVID dak sendakba agi süogo.

State karibo COVID-19 ajanga asür kibongtem nem teyari agütsütsü metetdaksüogo. Bihar-i kibong shia nem Rs 4 lakh, Madhya Pradesh-i Rs 1 lakh aser Delhi-i Rs 50,000 agütsütsü lemtetogo.

"Tarutsü anogotem COVID-19 ajanga asürtem nem-a sen agütsütsü" ta Centre-i tanü ashi.

"Covid relief operations mesüra iba dak sendakba mapa inyaktang asür nem teyari agütsütsü. Ajisüaka, Health Ministry-i lateta aliba ama tasubaji COVID-19 ajanga ta kuli alitsüla" ta parnokisa metetdaksü.

"State sorkari agütsüba form nung zülur agütsüba sülen anogo 30 tsungda iba maparen tembangtsüla aser senji Aadhaar-linked direct benefit transfer ajanga agütsütsü" ta Centre-isa Supreme Court dang metetdaksü.

## Dept. of Soil & Water Conservation ajanga training agütsü



**Dimapur, Rongjui/Sept. 22 (TYO):** Department of Soil and Water Conservation, Mokokchung ajanga September 21, 2021 nü DSCO conference hall, Mokokchung nung NMSA-SHC 2020-21 kübok Soil Health Card aser Soil Health Management atema anogo ka aluyimer nem training agütsü liasü.

Iba training nung Ongpangkong North aser South block kübok yimtsüng 19 nungi arua dena liasü. Iba sentong nung Alemtoshi, JSCO, Mokokchung menden liasü aser training agirtem pei sasa metetbelaba mapang agia Aoyanger, SCA, Mokokchung ajanga sarasademer sentong tenzüik.

Iba training nung technical session aser field demonstration liasü. Sentong nung Ruokuosietuo Dzuwichu, DSCO, Mokokchung ajanga tajungshi o jembiba mapang Government of India ajanga National Mission on Sustainable Agriculture (NMSA)

kübok Soil Health Card (SHC) aser Soil Health Management (SHM) Scheme tem atema maparen balala inyakba indang rateta ashi aser aluyimer dang alu tabu balala inyakba mapang ali temu aser item ketdangsuba nung temolung agütsütsü ajungshia liasü.

SHC agizütsü atema district kübok model village tuko nungi soil sample 2092 tendanga upload süa lir, anungji aluyimer temi pei lu nung ali temu jenjang metetsü, ta pai metetdaksü.

Tarutsü nung Soil Health Card ya Ration Card ama amshitsü aser iba ya ajanga dang aluyimer temi agri aser yangji sendaktepa aliba project tem inyaktetsü, ta pai aluyimer nem angatetdaksü.

Soil Health Card bushiba mapang technical tsütsü teyari agütsütsü molunga lir, ta paisa ashi.

Technical session nung Renbemo Nguillie, ACTO

(Horticulture), KVK, Mokokchung ajanga 'Enrichment of soil fertility through the use of green manures and bio-fertilizers' onük nung ajemdaker jembia liasü.

Iba sülen Samuel Sangtam, ACTO (Agronomy), KVK, Mokokchung ajanga 'Different types of compost making and its uses' onük nungi jembia.

Field demonstration agiba mapang Toshinenla Pongen, Junior Soil Conservation Officer, Mokokchung ajanga aluyimer dang soil sample bendentsü, sample bendenba nung GPS amshiba aser vermin compost amshia maparen balala inyakba sayua liasü.

Iba sülen Ruokuosietuo Dzuwichu DSCO, Mkg ajanga aluyimer nem Soil Health Card aser vermin compost tem lema agütsü.

Sentong tembanga Temjenyanger, SCAMokokchung ajanga melepzüng o jembia liasü.

## ABAM Social Concern aser Alempang Baptist Arogo AA ajungshitep sentong agi



**Dimapur, Rongjui/Sept. 22 (TYO):** ABAM Social Concern aser Alempang Baptist Arogo AA na September 21, 2021 nü Alempang Baptist Arogo nung ajungshitep sentong tajung ka agia liasü. Iba sentong nung Alempang nung aliba Alcoholic Anonymous (AA) parnok 40 shi aser kinungtsütem arua dena liasü. Iba sentong ya ABAM Social Concern ajanga Ao lim arogotem nung temesepba chiyungtsü achi ajemba nungi pila alirtem den ajungshitep nükla yur agiba sentong ka lir.

Alempang Baptist Arogo nungi Bendangmeren, Sunep aser Nekensangka Khensa Baptist Arogo ajanga melenshiba

taküm kuli aser Temsünla aser Imlimenla ajanga kibong nung melenshiba ajanga tepela bener aruba kuli lemsatepa ajak temoatsü angu.

Iba sentong nung shisa lemsa mapang nung Rev. Sangyula, Asso. Pastor Women Mangmetong Baptist Arogo aser Limasangwa, Coordinator, Media & Social Concern, ABAM ajanga testiiba mapang taküm reprangdanga Tsüngrem-i meimchir ya lenir kaka yanglu aser meimchir ka dak Tsüngremer ayak indang onük nungi shisa lemsa mapang agia kanga temoatsü ngua agiogo.

Tanü Ao arogotemi temesepba chiyungtsü achi

ajemertem anepalua nisung meyirjang dak tali melenshidakja arudar. Alempang Baptist Arogo nung dang tashi nung parnok 90 shi anepalua melenshidakja kanga temoatsüba nung anepalua arudar. Sannükeri anir tenzükeritem ajak dang kanga pelar aser Tsüngrem tenüng asanger. Maneni arogotemi rongsen aika intokaka sentong tajung yanglua parnok anebalutsü ABAM nükla ayur, ta Rev. Dr. Mar Pongener, Executive Secretary, ABAM ajanga sangdong ka nung ashi.

Alempang Baptist Arogo dang iba sentong achaayangba asoshi ABAM tenüng nung pelaba lemsateper, ta paisa ashi.

## Security Forces temi Niki Sumi telok nungi züngsem ka apu

**Dimapur, Rongjui/Sept. 22 (TYO):** Security Forces temi Police den lungjemer operation ka September 19, 2021 nü agiba mapang general area Chumukedima, Dimapur nung Niki Sumi telok nungi züngsem ka pua liasü.

Osang tejangja ka nung ajemdaker Security Forces temi State Police den lungjemer operation ya agiba mapang Niki Sumi telok nungi nisung ka apu aser pa ket nungi point 32 pistol ka den magazine aser point 32 indang injang ana nguteta liasü,

ta osang ka ajanga ashi.

Iba ken o maneni bushisüngdangtsü atema pua alisang den pa ket nungi ngutetba hadir ya Chumukedima Police Station, Dimapur nem amoktsüogo, ta osang ajangasa ashi.

## Naga Cemetery tasenba indang tzü supply semzüksü

**Dimapur, Rongjui/Sept. 22 (TYO):** Taoba Naga Council Dimapur tir, Asür K. Ghokheto Chophy tenüng nung OSD to Minister Transport, Government of Nagaland, Niholu Ayemi aser par kibongi tenla agütsü New Naga Cemetery, Dimapur nung yangluba 'water supply project' ya September 24, 2021 anepdang 9:30 ako nung semzüksü, ta Naga Council Dimapur indang tongti zülur, Thsapongkyu Sangtam-i sangdong ka nung metetdaksü.

Iba sentong nung Rajesh Soundararajan, IAS, Deputy Commissioner, Dimapur ya alakteta jaoker ama arua adentsü.

Anungji Zion Hospital nungi kilometer 2 pilar Zani Village nung aliba New Naga Cemetery nung iba sentong nung Councilors, Tribal presidents, DUCCF, DDCF, GB's (Sadar) Union indang ketdangpurtem arua adentsü mepishir, ta sangdong ajangasa ashi.

## SVEEP indang Kohima District Level Committee senden amen



**Dimapur, Rongjui/Sept. 22 (TYO):** Kohima District Level Committee for Systematic Voter's Education and Electoral Participation (SVEEP) pur senden ka Deputy Commissioner, Kohima indang office chamber nung September 21, 2021 nü mena liasü.

Special Summary Revision of Photo Electoral Roll dak sendakba SVEEP maparen balala yanglua inyaktsü atema jembishinütsü asoshi iba senden ya mena liasü.

Democracy tashi taitba kumdaktsütsü atema election maparen nung nübur tali shilem agidaktsütsü asoshi awareness agütsütsü atema SVEEP ajanga inyaktsü, ta Deputy Commissioner & District Election Officer, Kohima, Gregory Thejawelie NCS ajanga senden nung ashi.

Nüburtemi tali shilem agia asen democratic jangratemtsüka kumdaktsütsü atema mera balala agitsü nungdaker, ta pai ashi.

"Committee indang mapaji vote agütsür nem shisatsü tali agütsütsü aser shilem agitsü

nüngdak ta angatetdakja voter's literacy ajungkettsüla," ta DC, Kohima ajanga ashi.

Iba inyakim nung tongtipangtiba mapangji vote agütsütsü temsüa alirtem tenüng bendenba ya lir, kechi aser election tajungtiba nung agitetsü atema E-roll nung aibelen masütsüla, ta ashi.

Iba dak sendakba nung mera balala agi tenzükogo aser nükjidongji senso timbai shilem agia democracy tashi taitba kumdaktsütsü ya lir, ta pai ashi.

Paisa, district SVEEP sentongtem renemogo anungji awareness sentong aser SVEEP mapa tajungtiba nung inyaktsü atema Committee züngsem nungi tajungtiba nung shilem agidaktsüner, ta ayongzüka liasü.

AEO Kohima, Toshimeren-i züngsemtem dang SVEEP inyakim aser mapang telemsa aser 01.01.2022 ya qualifying date ama nükjidong yur inyaktsü indang jembia liasü.

DDK, AIR, NYK aser dangartem iba senden nung dena alirtemia SVEEP awareness sentong atema pei tangatetba lemsatepa liasü.

## Mantra & Surya Foundation ajanga Mon district nem medical oset agütsü

**Dimapur, Rongjui/Sept. 22 (TYO):** Primary Health Centre, Chen nung September 20, 2021 nü Deputy Commissioner, Mon, Thavaseelan K, IAS; SDO (C), Chen, Relise Sangtam; Suriya Foundation aser Mantra & Ashraya Hastha Trust nungi ketdangsurtem, PHC Chen nungi staff tem aser lokti tentet balala nungi lenirtem adenshia lia Pastor, Chen Town Baptist Church, Wangket-i Oxygenated Beds tejang pongu meshiteta sarasademja liasü.

PHC Chen nung amshitsü atema Medical oset aser mozü tem District Administration Mon-i achayanga Mantra & Suriya Foundation, Bengaluru kübok Ashraya Hastha Trust, Bengaluru ajanga tenla liasü.

Parnoki tenlaba oset ya Semi-Fowler Beds (5 Nos), Oxygen Concentrators (5 Nos), Flowmeters (5 Nos), Stabilizers (5 Nos), Pulse Oximeters (5

Nos), Hand Gloves (2 Boxes), N95 Masks (100 Nos), Face Shields (100 Nos), Extension Box (3 Nos), BP apparatus (1 No), Bed & Pillow Covers (50 Nos each), Stand Fans (5 Nos) aser Inverter alitsü.

Oxygenated Beds amenokba ajanga Chen Sub-Division nung COVID-19 tashidak wara aser danga tashidak den raraba nung shilem tulu agitsü.

Iba sentong nung Deputy Commissioner, Mon ajanga jembiba mapang Ashraya Hastha Trust, Mantra & Suriya Foundation, Bengaluru nem tenüngsang agütsü aser maneni COVID-19 tashidak wara mapang kising nung masü saka tarutsü anogotem nunga yariteptsü mepishia liasü.

Iba sentong nung MO, PHC Chen, Dr. Shokwang Konyak menden liasü aser SDO (C), Chen ajanga melepzüng o jembia liasü.



Golaghat district kükok Bokakhat nung Assam chief minister Himanta Biswa Sarma-i güntok tezüttem rongdokba sentong nung agiba noksa angur. Iba sentong nung pai o jembidang Kaziranga National Park nung museum ka lapoktsü aser idakji güntok tezü 94 ayutsü ta ashi. (Golaghat, September 22)

### Bodoland nung lanur 2 khasetba bushisüngdangtsü

**Kokrajhar, September 22, 2021 (Agencies):** September 18 nü Kokrajhar nung police-i United Liberation of Bodoland (ULB) telungpur ana khasetba bushisüngdangtsü atema Assam sorkari tuyuogo.

Bodoland Territorial Region (BTR) kükok district pezü nung ghonda 12 mokdangba sülen sorkari iba tetuyuba agütsü.

Kokrajhar kükok Ultapani nung ULB telungpur ta temolung melemi bilemba nisung aka khasetba bushisüngdangtsü atema Divisional Commissioner of Lower Assam Jayant Narlikar nem mapa lemzüksü.

Police-i tenaji ULB telungpurtem ta kuli agütsür saka yimdaklirtem aser ULB-ibo

tenaji telungpur masü ta shiogo. Asangur anaji Salguri nunger Jwnsar Musahary aser Parbatjhora nung Janak Kumar Brahma liasü ta jangaogo.

Assam sorkari Narlikar nem anogo 15 tsüingda bushisüngdangter osang agütsütsü mapa atakzüksütsü.

Tena khasetba anema BTR nung nisungtemi lungkak aiter aser All Bodo Peoples (ABP)-i Hombarnü ghonda 12 mokdangtsü ayongzükä liasü.

BTR nung tensa süngiemtsü atema taoba Bodoland Territorial Council (BTC) chairperson aser Bodoland Peoples' Front (BPF) tanishir Hagrama Mohilary-i Chief Minister Himanta Biswa

Sarma dang CBI nem bushisüngdang südaktsütsü takhangba agütsütsü.

Paisa UBL dang Bodoland region nung tensa raksatsüsü tayang meküpzüksütsü mesüra bomb tem meyütsütsü mepishiogo.

Taküm May 10 nü CM Himanta Biswa Sarma-i aniba Bharatiya Janata Party (BJP) sorkar akümba sülen Assam nung telungpur aser ozüing alema inyakertem den aiben khatepogo.

State police-i injang kanga khatoknür ta Assam nung Opposition-i tai tongloktsür.

Tesüiba ita ka ser tesadang tsüingda police-i nisung 26 khaset aser 42 yirutsü.

### Assam nung Oct 1 nungi class 9, 11 & degree 2nd year atema school lapoktsü

**Guwahati, September 22, 2021 (Agencies):** Assam nung October 1 nungi Class 9, 11 aser Degree 2nd year atema offline class tenzüksü ta Assam Chief Minister Himanta Biswa Sarma-i tanü metetdaksü.

Assam nung school lapoktsü atema Education

department-i SOP tasen metetdaksütsü, ta paisa ashi.

Sorkari cinema halls lapoktsü atema telemetba ano magi saka yakta agütsü ta Himanta Biswa-isa ashi.

Assam nung sorkar aser nija school tem nung Class 10 kaketshirtem atema Hombar nungi offline class agütsü

tenzükogo.

Assam sorkari COVID-19 inyakim sülen school tanaben lapoktsü temelaba agütsü.

COVID-19 tensa tajungba akümba nung ajemdaker lower primary class tem shilem lemsar lapoktsü, ta Education Minister Ranoj Pegu-ia metetdaksütsü.

### Manipur nung Rani Gaidinliu Railway Station ta tenüng melenshir

**Imphal, September 22, 2021 (Agencies):** Manipur Chief Minister Biren Singh-i Kaimai Railway Station dang Rani Gaidinliu Railway Station ta ajatsü metetdaksütsü.

British nung yimsüsüba mapang Rani Gaidinliu ya Manipur nungi nüjiso atema rarar ka liasü.

Lai nüjiso atema raraba bilemteta iba telemetba agi, ta Manipur CM-i ashi.

"Kaimai Railway Station dang Rani Gaidinliu Railway Station ta ajatsü. Rani Gaidinliu-i tanur asüadang Manipur nung British nung anema raraba asenoki teti bilemteter" ta Biren Singh-i metetdaksütsü.

### Manipur lanur kati CM dang PM scü merüksü ashiba atema apu

**Imphal, September 22, 2021 (Agencies):** Manipur nung Nongmaithem Boboy ta ser lanur kati Facebook post nung o tamajung züluba atema anogo 15 nü tepuokdak ayutsü.

Manipur Chief Minister Biren Singh-i Facebook nung Prime Minister Narendra Modi indang züluba nung Boboy-iba olen zülü.

BJP-i sorkar yimsü asüba state tem nung PM Modi indang tasoba anogo benjungmong nung merükmejuba mapa inyakba indang CM Biren-i zülü aser idangji arishi 22 tain Boboy-ia langka ka zülü.

CM Biren Singh-i züluba post nung Boboy-i "Modi indang scü merükang aser onoki reprangtsü" ta zülü.

Iba sülen September 19 nü

Lamphel Police-i Boboy apu. IPC 505(2-b) nungi 505(2) IPC kükok pa dak tai tonglokja apu.

Bodbarnü Imphal West Chief Judicial Magistrate Y Somorjit Singh tsüingdang Boboy video conferencing ajanga anir ao aser idangji anogo 15 nü tepuokdak ayutsü temelaba agütsü.

"Iba ya odang yutsü nung majungtsü kechiyong tarutsü nung tangaria ajizüka kasa inyaksü. Iba ken o timi bushisüngdangtsü atema pa judicial custody nung ayutsü tim ta ni oshidang agütsür" ta CJM Somorjit Singh-i ashi.

Iba tetuyuba nung ajemdaker Boboy ji October 5, 2021 tashi tepuokdak ayutsü aser iba sülen tanaben okadaki anir aotsü.



Tinsukia District kükok Tinkopani reserve forest nung sepaitemi police den külemi ULFA (I) züingsem ka apu. Pa ket nung point 22 pistol (Chinese) den magazine ka aser point 22 injang round 5 bena lia apu.

### Tripura nung TMC-i sentong ajak athir

**Agartala, September 22, 2021 (Agencies):** Tripura nung BJP-i aniba sorkari tenokdangbatem agütsüba sülen Trinamool Congress (TMC)-i sentong ajak thiogo.

TMC-i Tripura High Court dang Bodbarnü Agartala nung sentong ka agütsü asüingdang saka ibaji magizükba sülen sentong ajak athitsü lemtet.

Onoki sentongtem agütsü atema Tripura nung BJP sorkar dang asüingdanga aru saka parnoki magizüki dang aru. Tan sentong agütsü atema onoki asüingdangba atema parnok nungi telangzüba kecha maliasü, iba jagi onoki HC dang kechiba state ajungalen

S.144 benok ta asüingdang" ta TMC-i metetdaksütsü.

"HC-i policy telemetbatem nung tebang mair ta ashi aser iba jagi onoki Tripura nung sentong agütsü aliba ajak athir. Sorkari executive power yamai tashiyim agi amshiba atema onoki okadak ken o benoka kuli meshitsü" ta parnokisa ashi.

Ajisüaka, TMC lennir Abhishek Banerjee-i "Jogdaan karmasuchi" (joining programme) nung adentsü atema tanü Tripura-i aruogo.

TMC-i West Bengal nung sorkar yimsü asür aser BJP-i yimsü asüba Tripura nunga parnok pusemer aika lir.

### Manipur nung PREPAK-P telungpur ka apu

**Imphal, September 22, 2021 (Agencies):** Manipur nung People's Revolutionary Party of Kangleipak-Progressive (PREPAK-Progressive) züingsem ka puogo.

Imphal West district nung PREPAK-Progressive züingsemji apu. Pa ket nungi Improvised Explosive Device (IED) aika ngutetogo.

Telungpur ket nung fish cane nung sepbanger IED ka, airgun

rifle ka, PEK cakes 4, electronic circuits 3, remote control device 1, detonators 3, batteries, IED bombs yangludang amshiba soldering equipment aser mobile phone ka ngutet.

2013 küm Manipur Chief Minister indang bungalow gate nung IED pokdaksüba aser Imphal nung restaurant nung bomb pokdaksüba nung pai shilem agiba nangzükogo ta osang ajanga ashir.

**GOVERNMENT OF NAGALAND**  
**DIRECTORATE OF EMPLOYMENT, SKILL DEVELOPMENT & ENTREPRENEURSHIP**  
**NAGALAND, KOHIMA**

**NOTIFICATION**

Dated Kohima, the 21st Sept'2021

NO.DET-720/2001 (Vol-VI):513 It is hereby informed that Trade Test Exam under SCVT for the academic session 2020-2021 will be held in the month of October, 2021. In this regard, all Trainees (both regular & repeater) are hereby informed to fill up the examination form on or before the 30th September, 2021 in their respective Govt. Industrial Training Institute (Govt.ITI).

Sd/-  
**CHIDEN YADEN**  
Director

Issued by DIPR

**GOVERNMENT OF NAGALAND**  
**DIRECTORATE OF TECHNICAL EDUCATION**  
**NAGALAND: KOHIMA**

**NOTIFICATION**

NO. DTE/ ESTT-2/01/NEET/2021-22/ This is to inform NEET(UG)-2021 appeared candidates to collect the prescribed application forms for undergoing MBBS, BDS & Allied courses during the session 2021-22 from the Directorate of Technical Education, Kohima (Below New Secretariat Complex) on payment of Rs. 300/- (Rupees three hundred) only as processing fee with effect from 22nd September, 2021 during office working hours. The form can also be downloaded from the website www.dtenagaland.org.in and submit the same to this office along with processing fee.

The last date for issue and submission of completely filled form along with all necessary documents is within ten (10) days after the NEET(UG)-2021 is declared.

Candidates are informed to read all the instructions given in the prescribed form carefully before any entry is made in the form.

Sd/-  
**(Nungsangmenla Imchen)**  
Ex-Officio Director.

Issued by DIPR



## TIR YIMYIM YIMOBILEM (EDITORIAL)

DIMAPUR YANGTEPNÜ, RONGJUI (SEPTEMBER) 23, 2021

### Telok aika, nisungbo kasa !

**N**agaland nung, talisa, Dimapur nung tema aser telong government aikati shishilembartem dang nungi saru saruba manenba anema Confederation of Nagaland Chamber of Commerce & Industry ( CNCCI) aser Dimapur Chamber of Commerce & Industry (DCCI) teloki tan September 16 nü longkak aita shishilembaba tesem ajak shibangba sentong nung nübortemia parnok den longjemer shilem agiogo. Aji oda, Dimapur nung dang masü saka Nagaland nung tongtibang tesem aika nung CNCCI aser DCCI den telongjem sayua kasa anogo nung shishilembaba tesem kata melapok, takoksa-ang arema, longkak aita mongogo. Nagaland check gate nung aser shishilembadak tesem ajak nung saru saruba ya kar asoshibo mapa tajung ka inyaker ama yimya sübadokogo. Aji oda, item saru jagi dang nisung karbo kibonga mesüa alitsü aser tanurtema kaketreju balala nung züngdakja alitsü. Shibai metet, nisung karbo saru saruba kisung agi ayongayonga takar kümya alitsüa akok. Ajisüaka, ano külen saru agütsüba agi nisung karbo senotsü nung akoksaba dang masü saka tetsübu aser shisabolu agi temulungjang tashidak adoka timtema alitsüa akok. Aji oda, Nagaland nungbo nisung shisaboludaktsüba aser arishi temdokdaksüba tashidak tamajungtibaji Covid masü ozüng alema tema aser telong government-temi kar dang gate nung meshir aser kar dangbo mapa inyadkak aser karbo godown tonga arua meshir, ta taolen ajak nung saru meshiba timtem aser shisabolu ya asütsü. Ibayongji, saru agütsür magütsübo aser aremer maremzüktet shishilembartem telongjem teloki tan amai saru saruba anema ola adokdang, nübortemia pu asemer aser state government-i ozüng mamshitetba tali jangjar. Ajisüaka, ano shisabolutsü tulutibaji, NSCN-Niki teloki ashiba ama, Dimapur Goods Transport Association (DGTA) nung Vice President-bajiang ano NSCN-Khango telok nung tatar süra, ajibo saru sarurtemi saru saruba anema nübortem dang longkak aita sayuba amai asütsü. Atangji, DGTC aser NSCN-Khango teloki NSCN-Niki teloki DGTC vice president-baji NSCN- Khango telok ka nung tatar asüba jiyazü, paji taoba mapanga aser tanga NSCN telok nung züngsema mali ta jangjatsüogo. Aji shitak alitsü ta amanger. Ajisüaka, Nagaland nung iba ama mesükba mapa aser nisung aika lir. Ashiko, Nagaland government ita sen chia linük tenzükba mapa nung alirtema alitsüa akok, mesüra tema nunga lokti tentet lenir aser telong nunga tanishir ta nisung karbo alitsüa akok. Aji oda, kasa kibong nungisa süaka kar India government mapa nung tulur aser kar Naga yimten nüchiso bushiba telok nung tanishir ta alitsüa akok. Ano, kibong kar nungbo kasa tanurtem rongnung karbo Indian army aser karbo Naga army ta alitsüa akok. Iba ama tensa tia ka nung asenok alir, anungji telokbo aika saka nisungbo kasa ta jangjar mejangjatet asenoki asenoksasa mebentettet kangshir. Aji oda, kasa kibong nungi jabsotem rongnung ka Nagaland Legislative Assembly nung tatar aser ka Naga National Group ka nung tatar, ano kasa kibong nungi jabaso ka Deputy Commissioner aser ka Naga National telok ka nungi Area Commander, kasa kibong nungi ka Nagaland state government nung minister aser ka Naga National telok ka nung kilonser ta alitsüa akok. Iba amaji asenok ishika rongnung telok aika küma lemsaa yur asenok o asenok na saru agi mesüra mapa meinyak 'adjust' asüba angati sen agi taküm alitsü dang masü saka takar akümstsü merandang, Nagaland tejakbo tereprangtsüla masü ashirepogo. Asenoki yamai aliba nung nüma adanger na ? Aser yamai alitsüba ya jangratema bilemer na ? Iba amai lia lia Nagaland yabo kibong ka indang kumadoktsü aser nübortem rongnung injang amshia kar saru rakteper aser kar mapa rakteper ta alemli anululen lima nashi nukertem (cowboys) aliba lima ama kumadoktsü. Asenok tanü tema aser telong nungi teyari tilaka anguba agi temulung sür malitsüla, ibaji asenok aser asen chirnutem asoshi lendong bendener asütsü. Joko, nisungbo kasa saka government-bo aika nung shilem agir ta asüba jakla nem asenok manishidaktsütsüla. Iba jagi Naga yimten tebilemstsüa metembangtetter, kechiyong nisungbo kasa saka aika nung dena lir ta asüba purtemibo metembangnüsü.

## OLEMSABANG

### Naga nunger lanurtem daka tangar menupa asayatetsü sempet lir

- L. Kika Pongener

Tanü putu nung saisapong (Games & Sports) ya kanga tongtipang mapa ka kumogo. Akhidangbo saisapong ya temang anema aser tashi-ita alitsü asoshi benshiba (Physical Exercise) yimya ka, aser tekolok shisatsü nung anisungzük (Refreshment) angutsü atema sutok-sunema repringba (Entertainment) mapa ka amai benshia liasü. School nunga iba saisapong ya 'co-curricular activities' ka amai dang agia liasü. Ajisuaka, tanü putu nungbo saisapong ya kibong taküm mesua alitsüba mapa (Employment) tongtipang ka kumadokogo. Alima nung nungtuko Football Ball asayar rongnung Argentina nunger Lionel Messi, Portugal nunger Cristiano Ronaldo aser Brazil nunger Newmar ama asayar mongin, parnok yabo alima nung takar/nungtuko Club-temi sen Dollar million aika agi alizüker taa dalang agüja asayadaksür. Joko itum asayartem yabo Football Ball asayaba kisung agi takar tetsüdi 'Billionaire' kumadokogo. Asen India nunger rongnunga nungtuko Crickete asayar mongin Sachin Tendulkar, Mahindra Singh Dhoni aser Virat Kohli nunger yabo Crickete asayaba kisung agi takar tetsüdi 'Billionaire' kumadokogo. North-East India nungia Manipur state nungi tsüngteper mongin (Boxer) Marycom ama, alima nung nungtuko akümba dang masü, saka la nija meyong Boxing Academy tashi lapoktetsüsa tashi aser rongsen akaba jenjang tashi kumadokogo. Tsüngtepeba (Boxing) nung Medal anguba kisung agi alima nung nungtuko dang masü, saka takar/tulur kumogo. Tawa Japan lima Tokyo yimti nung 'Olympic & Paralympic' asayaba nung asen India nunger asayartem ishikati asaya tapu balala nung Gold Metal, Silver Medal & Bronze Medal ngua takok tajung anguba ajanga India nunger ajunga nem konang-nungsang bentsür aruogo. Kum aika India nunger asayartemi 'Olympic Games' amala nung ariana Silver Medal & Bronze Medal ka-ana anguba dak alaka Gold Medal-bo kodanga mongudangi aliba, tawa asayaba Olympic & Paralympic Games nungbo otsü-sutsü sua India nunger asayartemia Gold Medal dena angutsüsa asayatetba agi India nunger ajunga tesungmangtsü-ka pelatepogo. Ajiser, Medal angurtem nem Centre sorkar-i anir pei pei state sorkar-i sempet sen Crore paikato agütsüba aser sorkar mapa nung 'Post' tajung, oda tulur menden tashi nung shimokba, iba-to asen Naga nunger lanurtem asoshia tangazüksü lesson tajung asütsü. Talisa, state sorkar asoshia iba-to tangazüksü lesson tajung asütsü. Aji oda, iba ama mapa tajungjibo State sorkar-ia tangar dang nungia ajizüka inyaksüla. North-East India nung Manipur State nungibo Indian Hockey Team tebur aser tetsür Team anaprongla nung asayar karbo dena lir. Tsüngteper (Boxer), yindem taret ajungshishir (Weight Lifter) aser melangteper (Wrestler) karbo dena lir. Ano Indian National Foot Ball Team nunga asayar tajung karbo dena lir. Manipur State nungbo sorkar-i ochishia nendak-nendaka temulung agüja inyakba ajanga, National Games tashi ayonga asayatetsüsa asayadak moapu 'Stadium & Infrastructures' peria renema lir, kechiyong asayar mongin adoktsü asoshi Stadium & Infrastructures peria akatsü kanga tongtipang lir.

Asen Naga nunger ya akhi tsürabur mapang nungi nokinketer/temeranger sua aruba shilo lir. Anungji saisapong nung ya tangar dang nungi balaka alakteta asayatetsüsa tashi aser sempet keta lir. Asen Naga nungerbo 'Nu' (Spear) agi nisung/shiruru tsüngsetba, long onshishiba, alemshishiba, pongokshishiba, melangtepeba, asemtepeba, itum ya akhi mapang nungi benshiba sobaliba ka lir. Anungji yamala asayaba nung tangar dang nungi tajungba asayatetsü koka lir. Ajisuaka, Naga nunger lanurtem teimba ka azümesen, mapa kecha nunga teret-janga meinyaktetba, achi-ajem mazüok, libaliro mazüok, jakla tatsü, iba ama jakla yimya keta aliba agi saisapong nung tangar menupa masayateter. Ajak dak alaka State sorkar-i asayartem nem 'Facilities' peria magütsütetba, Stadium & Infrastructures' peria merenemtetba ajanga asayar mongin madoker. 1980's nungi Dimapur nung 'State Stadium' tenzuka yangluba ano tanü tashi merenemtet yua lir, iba yagi sorkar-i saisapong nung temulung magütsüba küli tejangja sayur. India nung Hero India Foot Ball League asayaba nung North-East nungia Meghalaya State nungi 'Shillong Lajong Club' aser Mizoram State nungi Club ka dena asayadagi. Shitakba-bo Nagaland nungia Club kabo adoktsü takoktsü lenmang lir. Surabangla, iba ya lanurtem tai asü State sorkar tai asütsü...??? Lanurtem-ia tangar ama temulung agüja nendak-nendaka masayar, saka ano sorkar-ia temulung magütsür. Sorkar-i temulung magütsüba dang masü asayartem nem senotsüa aser 'Facility' peria magütsür. Aji oda, state sorkar-i saisapong nung senotsü endoktsü kanga kürur. Ajak dak alia, saisapong nung asayar mongin adoktsü atema 'Stadium & Infrastructures' peria akatsüla. Tanü tashi nung asen Naga lima nung National Games ayonga asayatsüba-jibo yutsür, North-East Sports Festival danga ayonga asayatsüsa asayadak moapu aser nungdakba osetsüset (Stadium & Infrastructures) peria maka. Iba ya kanga junga shisadangra state sorkar-i zübazüba toktsüba, aser talisa Youth Resources & Sports Department-i suoki ia mebilemer ta ashitsü akok. Ashiko, Centre sorkar-ibo tanga state nem agütsüba ama, Naga nunger nema saisapong renloktsü atema senotsü peria agüja alitsü sudi.

Taoba ita nung Global Association of Mixed Martial Arts (GAMMA) Asian Championship Kyrgystan nung asayadang, Naga nunger lanur rongnung-ia Mr. Longtsükümba Ao-i Silver Medal & Mr. Arsenba Ozüküm-i Bronze Medal ngua India nunger ajunga nem, talisa Naga nunger nem konangnungsang bentsür aruogo. Ajisuaka, tanü tashi nung State sorkar-i tenungsang agütsüba, senpet karbo agütsüba osang kecha mangur...!!! Ni aibelener ka mesura tanü tashi nung ibala indang adokba nibo mezüngshi...!!! Mapa tajung nungbo tenungsang agütsütsü atsü-ayung masütsüla. Mapa tajung nung tenungsang agütsütepeba agi tarutsü putu asoshi senmang tajung rizünger. Aji oda, mapa tajungbo tangar nungia ajizüka inyaksü kanga tongtipang lir. Atangji, saisapong atema Stadium peria maka, Infrastructures peria maka, senotsü endoktsü-a kürur aser takok angur nema tenungsang/senpet-a magütsünur ta asüba sorkar dakji nuburtemi tajung mechiteter. Kodang saisapong nung takok tajung angur nem sorkar-i tenungsang/senpet agütsüdir, lanurtemi saisapong nung toktepa asayatsü jangra-a akümstsü, kechiyong tenungsang agütsübaji tajongshiba hadir tajung ka lir.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Evangelist Franklin Graham-i 'God Loves You Tour' tenzük



**Joliet, Rongjui/Sept. 22 (Agencies):** Evangelist Franklin Graham-i anogo 14 atema "God Loves You Tour" Deobarnü tenzükogo, aser iba mapang pai United States kübok yimti ti nung Yisu Khrista indang osang tajung lemsaa jajatsü.

Samaritan's Purse aser Billy Graham Evangelistic Association (BGEA) indang tir Graham-i Joliet, Illinois nung aliba Chicagoland Speedway nung nisung 8,700 adenshia alidak sayutsüngia iba tour ya tenzük. Pai yangji sayutsüngiba mapang, alima nung tabu minna atalokaka Tsüngremi parnok meimer, ta ashi.

"Nisung aikati tsübur. Nisung aika shisabulu nung lir. Nisung aikati kechi inyaktüar memetet. Küm 20 tejakdang 9/11 ajanga alima melenshitsu. 2020 küm tashidak wara agi alima melenshitsu. Tsüngremi na meimer ta ashitsu ni yangi lir."

CBN News ajanga ashiba agi, tashidak wara mechi ita 18 nung Graham-i lokti tulu den jembiba Deobarnü sentong ya mezüngbuba alitsu. Iba tour nung pa meina Khristan ken atener Newsboys aser Hispanic kentener Marcos Witt aser Dennis Agajanian

nungertem senzür.

BGEA ajanga ashiba agi, yangji aliba evangelist Angel Rocham-i nisung tuko God Loves You Tour-i anir aru aser parnok rongnung nisung anati tena takum Tsüngrem nem bendanga agütsü.

"Nai Tsüngrem temeim angatetba mapang nai dangar dang ashiba manennütsü. Aser nai kotaki ya dang bener aotsü," ta Rocham-i ashi.

Ano iba sentong nung adener Lori-ia lar jala arishi küm 20 tain McKenna ya anir yimti ti prong sema jajatsü sentong lir. Taoba mapang Lori ya BGEA indang Search For Jesus online ministry nung tenzükia liasü.

"Ni kota pela aliar ni meshiteter. Iba ama maongka ya taküm piyong nung khen ang ajurutsü. Asen tamang dangar den lemsateptsü Tsüngremi asen nem nungloktsüba atema ni ajemalushir. La den külemi yamai jajattetba ya rongsen jenti dang taoba."

God Loves You Tour ya September 19 nungi October 2 tashi alitsu. Iba osang züluba mapang tashinung tanabuba sentong ya St. Louis, Missouri nung aliba World Wide Technology Raceway nung

Mongulbarnü agitsü liasü. Iba tour ya Springfield, MO; Oklahoma City, OK; Amarillo, TX; Albuquerque, NM; Flagstaff, AZ; aser San Bernardino, CA yimitem nunga agitsü.

Graham'er jabaso Will Graham-i Hombarnü sangdong ka nung, tebu tour nung sayutsüngia jajaba mapang pai Rapid City aser Des Moines nung sentongtem agitsü, ta ashi.

"Aruya aliba hopta tem nung kübu @Franklin\_Graham aser ni linük tesem balala nung Yisu indang teimla lemsatsü. Pai otsü aliba Route 66 nung aliba yimitem nung sayutsüngitsüasir ni Rapid City aser Den Moines nung nüburttem den jembitsu. Tsüngrem tenüng tali sentsüwangshijang aser aikati Pa tenüng tushiangma," ta Will Graham-i tweet asü.

## ANO GO ABEN TSÜNGREM DEN

### Tekolak ka dang nungi ana tajungba

*Ka dang nungi ana tajungba kechiaser parnoki inyakba asoshi taa tajung lir. Sayutsüngir 4:9*

Alima nung mapang ajak nung shisatakataba Solomoni ibai zülu. Pa chuba tajung ka, Tsüngrem shisatsü agi sünga liasü aser bendangtsür pa kinüngtsütem asütsü agir külen pai ochi Tsüngrem toktsür tangar Tsüngremtem sülen anidak. Taküm tatem len Israel Tsüngrem nungi pilar pei sasa jangratem leman bushiba amajok ta pai zülu. Pai meimchir shisatsü amajok mesüra tamachi, meimchir kisüngi merangba aser takok amajok ta zülu. Pai meimchir tashi, merumeru, bendenba aser yimsü amajok ta jembi. Item ajakji mopung sülen arishiba ama lir. Saka item jembiba tiyong nung Solomoni kijai mesüi yaritepba inyakba koda tongtipang iba indang jembi. "Ka dang nungi ana tajungba kechiaser parnok mapa asoshi taa tajung angutsü."

Takümji lokti kümteta alitsu asoshi yanglu. Eden Tsüki nung Eva matsüngdang ibai angatet. Taküm sendaktepa alitsu yanglu, kija alitsu atema masü. Kari pei mulungba nung dang aotsü bilemer, pei mulungba dang inyaktü bilemer. Saka atangji tekolak ka dang nungi ana tajungba lir. Ibai satiba nung dang masü, saka shishilembaba aser arogo nunga shidak lir. Ka mapa kar nung tebilemba tajung alitsu akok, saka tanga ka nungbo kecha memetetti alitsu akok. Anaji kati ka yaritsu akok. Tashi taitangi tashi maitsang yaritsu akok, ano iba dang nungi tajungba, "Lisü asem mesentepbabo yakta metokdangtsü" (t.12). Tembar ayimba nung, satiba, shishilembaba tesendaktep, yamala, nung Tanela Temeshi den sendaktepba lira tashi itta alitsu. Asen Teyangluri asenok sendaktepba alitsu yanglu ta bilemtettang.

Kibuba, kü taküm nung tabensa tesendaktep aliba asoshi Ne tenüng asanger. Adianu dang nungi Na kü den anasaba lir. Amen.

## ISIS temi Afghanistan nung Khristanpur nisung pezü tepset

**Kabul, Rongjui/Sept. 22 (Agencies):** Taliban-i masü saka ISIS temi Afghanistan nung Khristanpur nisung pezü tepset, ta osang ka ajanga ashi.

Linük nungi jena aotsü merangba telok tuluba bushia zütepa aliba kibong kar oyaa liasü, ta FMI den inyakba Nehemiah ajanga ashi. ISIS-i parnok dang, 'Nenok ya Muslim nung masü ta ponoki angashio. Anungji nenok ya shidakba Muslim nung masü na? ta asüngdang. Idangji parnoki, 'Hao, onok Muslim masü. Onok Khristanpur,' ta langzua liasü.

Anungji iba kibong nungi teburtem yangjisa tepset aser tanur aser tetsürtem yok, ta Nehemiah ajanga ashi.

Nehemiah ajanga parnok dang kotasür azüdokshir ya ISIS tem ta shiteter, ta asüngdang. Idangji parnoki ISIS nisan amer

liasü aser parnok uniform sentsü tanak agir liasü, ta iba kibong yagi langzü.

Saka ISIS temi Khristanpur kisüng dak tenük meyoker. US sepaitemi par nüburttem anizüker aoba anogo tatemlen Kabul airport nung amakba atema parnoki tenüng agia liasü. Ano tawa linük anüdoklen Jalalabad yimti nunga parnoki tapoktsü oset kar yuja liasü. Item lendong nung nisung aika yiru aser asü.

ISIS den sendaktepa alirtemi Taliban ya kanga tesashibo masü, ta amanger. "ISIS ya tesem ajak nung lir. Aser kodang asenoki ISIS aser Taliban indang jembidir, parnok ya tangatetba kasa dang lir," ta Nehemiah-i ashi.

Telok ana yagi nübu mebushir saka nüburttem pei tangatetba nung telok mashi ka nung adener, ta ashi.

## God's Not Dead actor-i Khrista dak tamang akatsü ajungshir



**Washington, Rongjui/Sept. 22 (Agencies):** Actor Antonio Sabato Jr, shiba God's Not Dead film installment pezübuba nung tongti shilem agitsü lir, pai Khristanpur dang Yisu Khrista dak tamang akatsü ajungshi.

"God's Not Dead: We the People" nungja agüja aliba movie yagi tanurtem nem shisaliok angazükdaktsütsü atema 'freedom of speech and religious liberties' ya temeden ka ama angutsü.

David A.R. White, shiba God's Not Dead film mezüng asem nung tongti shilem agia lir, pa ya Rev. Dave Hill ama shilem agitsü.

"Ibai kü medemer den yangluba movie tajung lir. David White aser production company ajunga, yangi shilem agitetba aser kü molung nung aliba shilem ka agitsü asüngdangba

atema akum ka ama bilemer. Ibai otsü kanga tajung lir aser tetetzü tajung lir," ta Sabato-i tawa The Christian Post dang shia liasü.

Iba film ya asen linük nung tarutsü tamangba yimsü temeden jenjang ka ajangettetsü atema Reverend Dave ya Washington D.C nung congressional hearing nung kuli agütsütsü jaokba indang otsü ka lir.

Sabato ya 1990s mapang Calvin Klein underwear model ka ama nungtugu akum aser iba sülen soap opera General Hospital nung tongti shilem agia liasü, aser iba film yagi tanü tensa nung 'freedom of speech' aser tamangba yimsü temeden nung timtem agütsüba indang sayur, ta amanger.

"Tang yimya balala nung asen temeden nung timtem

agütsür. Anungji asenok tasü ita nokdaktsüla. Tsüngremi asenok tendanger ama ni bilemer," ta pai ashi.

"Asenoki maneni raratsüla aser asenoki maneni amangtsüla aser kechi südir süaka Tsüngremi takok angutsü ta metettsüla. Saka asenok temai adoka Tsüngrem nem bendanga agütsütsüla."

Khristanpuri temenen ajurutsü saka teti tatem nungbo asenoki takok angutsü, ta Sabato-i ashi. Pai Khristanpur dang kumdanga alitsu aser bendanga agütsütsü ajungshi, kechiaser timtem mapang tamang agi kumzüker.

"Asenoki osang dak metaloker melitettsü; asenoki nisung dak metaloker melitettsü; asenoki meimchir dak metaloker melitettsü, asenoki ajak nung asen Tsüngrem dak metaloka alitsu," ta pai ashi.

"Movie ya mapang shidak nung yanglur. Tsüngremi aibelen masür; ibai tia agi ajurutepba masü," ta Sabato-i ashi.

"God's Not Dead: We The People" ya theaters nung October 4 nü sayatsü. Iba film nung Sabato, Isaiah Washington (Grey's Anatomy) aser Grammy sempet angur Khristan artist Francesca Battistelli nungertemi tongti shilem agir.

**OLONG PAITEP # 5945**

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

- |                              |  |   |  |
|------------------------------|--|---|--|
| <b>TIPILEN</b>               |  | <b>LANGTSÜNGLEN</b>                     |  |
| 1. Yakob tetsü - (6)         |  | 2. _ _ _ gki - (3)                      |  |
| 4. Mezüng nisung - (4)       |  | 3. Telungpur telok ka - (2)             |  |
| 6. Tasen lai kakat ka - (5)  |  | 5. Tsüngremi mezüng poktetdaksüba - (5) |  |
| 9. Au lanu - (2)             |  | 7. Tia - (4)                            |  |
| 12. Tejen lai 21 buba - (11) |  | 8. Yakob-er jabaso ka - (5)             |  |
| 15. Tekolak tembar - (2)     |  | 10. Abraham tebutü - (4)                |  |
| 16. Zütsüra anepsang - (5)   |  | 11. Rebeka kinungpu - (4)               |  |
| 17. Kain tenu - (4)          |  | 13. Esau tenu - (5)                     |  |
| 18. Hana-er jabaso - (6)     |  | 14. Tzünglu tilala aru - (4)            |  |
|                              |  | 16. Jafet tebu - (3)                    |  |
|                              |  | 17. Teka agi kongshi - (2)              |  |

**OLONG PAITEP # 5944 TELANGZÜBA**

- |                                   |   |
|-----------------------------------|---|
| <b>TIPILEN :</b>                  | <b>LANGTSÜNGLEN :</b>                   |
| 2. Pongsen, 5. Lepko, 7. Omen,    | 1. Alimang, 2. Pongen, 3. Samaru,       |
| 8. Maongka, 10. Yangkhu,          | 4. Nün, 6. Pio, 9. Nüngdak, 10. Yongya, |
| 12. Senpong, 14. Angu, 15. Raksa, | 11. Kongro, 13. Ora, 14. Ata.           |
| 16. Arameso,                      |   |

**ALOKBA O WARAKLA NA TAIN AKÜMBA TIMTEM :**  
*Ayaterm nung Warakla smart phone nung "Beep Beep"*  
**adoker. Alokbai lasa reprangdang nung "Beautiful" ta ajitet.**

**Alokba** : Hai, ya shibai ayaterm nunga beautiful ta message yokerba, kanga kümdangang no.

**Warakla** : Kwa Kwa, na ang tamachi ati, tenük aina kaloker reprangangma, "Battery full" ya lir ya koda, saala!

**Alokba** : Sorry, kechisarna ajak züklaa akümerajai, tambur ya tagidak maka kümdar nii.

**Lilir : WhatsApp**

**TANÜBO NAI LANGZÜANG**

Q. India indang 61buba Software Technology Park of India (STPI) centre ya koba nung lir.

A. Manipur                      B. Mizoram  
 C. Nagaland                    D. Tripura

===== (Taruba adok nung onoki langzüsü)

**YASHI ADOK TELANGZÜBA : US**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Kütsü**  
 (n) ni asola ojala (my mother)  
 \* Alima nung **kütsü** temeimsa tuluba lir.

**Küttsü**  
 (n) süoshi aser senti oset ayutsü atema arr aser yong agi atakba oset (traditional suitcase made of cane and bamboo)  
 \*Akhidangbo **küttsü** nung dang senti oset aser süoshi ajak rizünga ayu.

**NAI-A YA METETTER MA**



Royal Caribbean indang 'Wonder of the Seas', koba cruise ship rongnung tulutiba asütsü, sangküm March 4, 2022 nü Lauderdale, Florida, United States nungi iba rong tzüyim nung senzü tenzüksü renemdar. Barcelona aser Rome nati maodang, iba rong Caribbean ajanga aotsü. Daily Star sangdong ajanga angazükba agi, iba rong tasazük metong nung süklep 1,188 (362m) talang aser lenden nung süklep 210 (64m) asütsü. Iba rong kübok deck 16 nung nisung 7000 shi asemtsü/ayitsü, kong crew member 2,300 dena lir aser guest elevator 24 yanglua lir. Royal Caribbean-i ashiba agi, tzüyim nung iba rong tendangtsü tenzükogo aser iba mapang rong yagi 24 knots (27mph) nung nautical mile 1,500 shi ayimjema senzüogo.

SUDOKU # 5986						TELANGZÜBA # 5984									
4	7	9	1	2	8	1	2	8	6	9	4	7	3	5	
	9	8	4	5		5	7	3	1	8	2	9	6	4	
6			5			6	4	9	7	5	3	1	2	8	
9		8	2	1		2	8	1	5	6	7	3	4	9	
			6	2	4	3	3	9	4	8	2	1	6	5	7
7	2		4	9	8	6	7	5	6	4	3	9	8	1	2
	1	4	6	8		2	4	6	5	3	7	8	2	9	1
5	2			8		8	3	2	9	1	5	4	7	6	
8	7		2	3	6	1	9	1	7	2	4	6	5	8	3

**OJANG LUTEP # 5531**

EIP :

MNE :

OATSMÜBA :

ETSEMP :

MSTAH :

HISA :

UNGTITAJBA :

UNNG :

SHITSAMÜ :

ANGMERANG :

**OJANG LUTEP TELANGZÜBA # 5530**  
**AIBEN SHIJEN SHIR TASHI MANGAR DANGBO**  
**TEMERENSHI TAPET AGÜTSÜTSÜ DALANG**

**TAN HOPTA ATEMA - KOMA SÜLA ?**

Q. Nagaland nung school-tem ya akhi ama lapokdaksü nunga koma süla ?

Olong 20 shi nung September 24, 2021 tashi nung iba telangzuba ya onok dangi (e-mail - tiryimim@gmail.com) :  
 (SMS - 9856121232 / 9436072422) : (WhatsApp - 7005723372 / 8729995804) : (tiryimim.in) ajanga yokang. Telangzubatemi taruba Honibarnü adoktsüsü.



Chandigarh nung 'World Car-Free Day' amungba mapang minister aser MLA tem den Haryana Chief Minister Manohar Lal Khattar, par kidang nungi Civil Secretariat nung pa indang office-i cycle nung mener aoba noksa nung angur.



OFFICE OF THE  
UNGMA SENSO TELONGJEM

DIMAPUR : NAGALAND

### Tenungsang Agutsur

Wb. I.Alempokba Imsong aser Wt. Talingangla tena jala **Kr. Imwapangla Imsong**-i Omen: "Contours of Eco fiction: Canon and beyond" nung ajemdaker tezüluba temtetta Nagaland Univesity nungi Ph.D degree ngutetba atema Ungma Senso Telongjem Dimapur-i pelaba aser konang nüngsang agütsür.

Tsüngremi La tarutsü anogotem nunga kasa moaja len aniangma ta sarasadem nung abener.

**Wb. Takanungba Longkumer**  
Tir, USTD

**Wb. Lipokmeren Longkumer**  
Tongti zulur, USTD

## Kerala HC-i police dang corona anema raratem kümzüksü tuyu

**New Delhi, Rongjui/ September 22 (Agencies):** Kerala high court-i Bodhbarnü state police dang ozüing anema inyaksangshirtem ket nungi coronavirus tashidak anema rarartem taküm kümzüksü asoshi kümkümschia alitsü metetdaksüogo. Anogo ana tejakdang Alappuzha nung bike ana nung mener arua tetsür health worker ka amakba sülen iba tetuyuba agütsü.

Hombar aonung tetsürla ya mozükidang nungi lar kidangi meyipa oya aliba mapang iba lendong atalok, ta police temi Mongolbrnü metetdaksü. Police-isa, item nisungtem yagi la ket nungi rakzürakdemtsü tebilemba liasü, saka la ket nung ket nung rongsen kecha mali ta jangjaba sülen la pur aotsü merang ta ashi.

Thrikkunnapuzha police station, Station house officer (SHO)-i PTI dang ashiba agi, ozüing anema inyaksangshirtem yagi nursing assistant la ya arishia ao saka police patrol ka arua anguba sülen jena ao. SHO-isa, tetsürla ya yiruyipongbo masü saka kanga aoksar lir, ta ashi.

Bodhbarnü justices Devan Ramachandran aser Kauser Edappagath nati "Onoki iba ken o ya amar khen khen dang atalokba ken o ama magir. Onoki iba ken o ya süoki ia agir kechiyong iba ken o ya tarutsü nung mora aotsü. Iba amala inyakyim raktoktsü mapang tongogo," ta ashi.

Ken o angadanga mapang sorkar tenüing nung nokdaksang S Kannan-i Kerala HC bench dang, FIR

ka benokogo aser police temi ken o nung aibelena alirtem jangjatsü merangdar, ta ashi. Kannan-i iba ya kanga bulua atalokba tatalokba ka masü ta ashi.

Ajisüaka obendangertemi sorkari benokba ken o magizük aser iba ken o ya temzüing ozüing dak sendakba ken o ka lir ta ashi. Covid-19 tashidak anema rarar ka amak asünung obendangertemi iba ken o ya tawa mozükitem nung health care worker aser doctor tem amakba anema benokba ken o tem ama agitsü, ta PTI-isa metetdaksü.

Bench-isa, Covid-19 tashidak anema raratem aser parnok mapa dak sendakba nung lokti-i parnok timtem lendongi midaktsüi kümzükä ayutsüla, ta ashi.

## 'Modi sorkari AAP tenüing menüktsütsü meranger': Raghav

**New Delhi, Rongjui/ September 22 (Agencies):** Tawa Enforcement Directorate (ED)-i lenirtem jaokba dak sendakba nung Aam Aadmi Party (AAP)-i Bodhbarnü Narendra Modi-i aniba Union sorkar aitsüogo.

New Delhi nung ED headquarters kima osangbenertem den sensaksema mapang AAP otongdar Raghav Chadha-i, "APP aser party lenir Arvind Kejriwal kanga nüngtugu akümba ajanga Modi-i aniba sorkar minpronger aser iba ajanga AAP tenüing menüktsütsü aser timtem agütsütsü aser onok mapang intoktsütsü atema sorkar agencies tem yok tenzükogo," ta ashi.

Chadha-isa, Enforcement Directorate ya Modi sorkari kanga sakloker ta ashiba den sorkari iba agency ya parnok den tokteperitem anema inyaksangshidaksür, ta ashi

ED-i September 13 nü Punjab Congress MLA Sukhpal Singh Khaira anema ken o bushitsüingdanga dak sendakba nung AAP national general

secretary Pankaj Gupta jaok. Khaira ya senotsü ochi meshi amshiba ken o ana nung aija lir.

Gupta dang Seprtember 22 nü ED matsüingdang nokdaksü tetuyuba agütsü. Iba ken o jangjaa aliba ketdangsürtemi Hindustan Times dang ashiba agi, Khaira anema ken o benoka aliba jangjashitsü atema Gupta jaok. Khaira ya Bholath constituency nungi MLA aser taoba APP lenir ka lir.

AAP otongdar Raghav Chadha-i Bodhbarnü ashiba agi, taoba küm tenet tsüingda Bharatiya Janata Party (BJP) lenir ka danga ED-i majaok.

"AAP tentetba sülen küm shia income tax notices agüja arudar. Onük MLA 21 anema taila ken o benokogo. Onok chief minister indang office aser deputy chief minister o health minister kia mitaogo," ta Chadha-i ashi.

Paisa, BJP-i APP den tokteperna parnoki Arvind Kejriwal indang inyakyim benksüla, ta ashi.

AAP general secretary Pankaj Gupta jaokba sülen Delhi chief minister Arvind Kejriwal-i September 13 nü

ashiba agia, BJP sentong kodanga takok mangutsü aser iba ajanga par party tashi taitba dang kümduksütsü.

## "Ni Sidhu CM mekümdaktsütsü": Amarinder Singh

**New Delhi, Rongjui/ September 22 (Agencies):** Taoba Punjab chief minister Amarinder Singh-i Bodhbarnü ashiba agi, pai Navjot Singh Sidhu kodanga Punjab chief minister mekümdaktsütsü. Ajisüaka chief minister asütsü atema Charanjit Singh Channi shimba sülen taruba election nung Punjab Congress tir Navjot Singh Sidhu CM akümtsü atema lenmang sadema lapoktsüogo.

Amarinder-i, pai Sidhu CM mekümdaktsütsü atema tashi tait candidate ka yoktsü ta shiogo aser iba ajanga yimden yimsüsüba tsütsü pa tarutsü mejangjai kümogo.

Party yongtsü nung mangatettep adokba sülen Amarinder Singh-i CM mapa toktsü. Pai, party nung temelenshi ajanga pa kanga

## India nung vaccine dose ana tsüingda mapang ajemshitsütsü akok

**New Delhi, Rongjui/ September 22 (Agencies):** India-i private mozüki aser clinic tem nung agiba AstraZeneca Covid-19 vaccine dose mezüingbuba aser tanabuba na tsüingda mapang tajemba kümduksütsü akok, ya source balala anati Reuters dang ashi.

Private mozüki aser clinic tem nung taa agütsür vaccine agirtem nem vaccine mezüingbuba dose agir hopta pezü lir tanabuba dose agitsü atema maongka agütsütsü. Tang iba vaccine mezüingbuba dose agir hopta 12 aser 16 sülenang tanabuba dose agir.

Iba hopta tetenzüklen Kerala high court-i, taa agütsür vaccine agirtem nem iba maongka agütsütsü atema health ministry indang vaccine-booking platform nung temelenshi kar bener arutsü tetuyuba agütsü.

"High court-i obendang agüjatokerji inyüksü," ta source kati ashi. "Sorkar programme

atemabo hopta 12 ji tapet asütsü."

India nung tashidak kanga kara prokshia aoba aser vaccine agi anüingba mapang May ita nisung timba nem vaccine dose kabosa agütsütsü nükjidong nung AstraZeneca vaccine mezüingbuba aser tanabuba dose na tsüingda mapang atsülangtsü.

AstraZeneca-i vaccine mezüingbuba dose agiba sülen hopta pezü lir tanabuba dose agitsü teyur, ajisüaka parnok indang website nung hopta pezü dak tema tetsüingda yur tanabuba dose agiba ajanga tajangzük tali agütsür ta shia lir. World Health Organization-ia hopta ti nungi 12 lir vaccine tanabuba dose agitsü ajungshir.

India nung May sülen ita nung vaccine dose million 300 yanglur. Vaccine quarter ka dang nungi ishiba ka dang nija mozükitem ajanga agütsür aser tanungba sorkari angati agi agütsür.

mak asüba lemsatep. Party nung lenirtemi pa dak tamang makateti akümba atema pa yiruba pai lemsatepa liasü.

Amarinder Singh melentsü atema pai mejangjai Congress Legislature Party senden ka Deobarnü ayongzükä liasü. Senden mamen tsüingda Amarinder Singh-i Angh dangi oa mapa toktsü. Paisa, pa telemtetba Honibar anepdang party tir Sonia Gandhi nem metetdaksüogo, ta ashi.

Charanjit Singh Channi tenangzüktepa agiba sülen anogo ana lir Bodhbarnü Amarinder Singh-i ashiba agi, pai pa mapa toktsütsü atema hopta asem jelia benokogo, ajisüaka pa mapa maneni abentsü atema shia liasü. "Iai kü dangi call süa mapa toktsütsü atema shira ni mapa toktsüla. Sepai ka

ama ni mapa koma inyaktüsü aser tajaba dak ajemdaker mapa kodang toktsütsü aji meteta lir," ta Singh-i ashi.

"Priyanka aser Rahul nayo ozü tanur ama dang lir. Ken o ya yamai metembang nung jungla. Ni kanga yiruogo," ta Singh-i ashi, shiba asür Rajiv Gandhi tembar liasü. Singh-isa, parnok advisors temi mashileni aniogo, ta ashi.

Gandhi'er kibong den Amarinder Singh tesendaktepa asadanga Punjab nung mepetmesü adokba aser Singh mapa nungi ajungbena anentsüba ya ataloktsü imlaa maliasü. Amarinder Singh-i, election atongtsü lia aser nüburtemi pai aniba sorkar dak temulung süa dang aliba mapang ka nung party-i pa melenba ya mangateter ta ashi.



National Mall, Washington nung COVID-19 tashidak agi asüba America nungertem bilemtettsü atema Suzanne Brennan Firstenberg indang "In America: Remember," (temporary art installation) nung shilem ka ama wako temesüng songer aliba tesem nung tesemdangertem amenba noksa nung angur.

### India arrtsü nung aliba Myanmar nungertem aika jenshir

**Yangon, Rongjui/September 22 (Agencies):** India den arrtsü nung aliba Myanmar jilatem nung alirtem timbaka jenshiogo. Military yimsüsüba anemba telungpurtem aser army na tsüngda mangatetep adoker aliba mapang ka nung item jilatem nung kitem rongtoksüba sülen nürburtem aika jenshiogo, ta iba tesem nung alirtem aser media sangdong balala ajanga metetdaksü.

Chin State kübok Thantlang tesem nung nütsüngyongsük 10,000 shi lir, ajisüaka parnok timbaka India densema kidanger state aser jila balalai jenshiaogo, ta lokti lenir kati ashi.

Pro-democracy lenir Aung San Suu Kyi-i aniba sorkar February ka nü military-i atsüngtokba sülen Myanmar nung mepetmesü tulu adoker lir. Sorkar atsüngdokba sülen linük ajunga nung nürburtemi longkak ait tenzük aser kasa mapang nung junta anema telungpur teloktem poktetogo.

Taoba hopta tatemi military aser telungpurtem na khatapba mapang ki 20 tashi rongtokja liasü. Social media balala nung kitem nung mi jangrur aliba noksatem ayimsünga prokshio.

Sepaitemi Khristan pastor ka khaset, shibai mi temseptsü meranga liasü, ta Myanmar Now news portal sangdong ka ajanga metetdaksü, ajisüaka state media-i iba osang ya magziük.

Global New Light of Myanmar sangdong ka ajanga ashiba agi, pastor ka asüba ken o ya tang bushisüngdangdar aser sepaitem ya telungpur 100 shi-i arrmena atar amakba sülen telok ana tsüngda khatapa liasü. September ita tetenzüklen telungpurtemi army base ka atsüngtok aser iba atema telangzüba agüja military-i tayimsü amshia telungpurtem maka liasü, ta lokti lenir Salai Thang-i ashi. Paisa, hopta tsüngda civilian pezü tepsetogo aser 15 yirua liasü, ta ashi.

Military yimsüsüba anemba telungpur telok Chin Defence Force sangdong ka ajanga ashiba agi, parnok i sepai 30 tepsetogo.

Reuters-i item osangtem ajak jangjashitsü merangdar ajisüaka osang tejangja mongutet aser military otongdaria ken o dak sendakba nung kecha telangzüba magütsü.

Army-i tepsetba pastor-baer kinunger kati Reuters dang ashiba agi, nürburtem timba iba jila toktsür jenshiaogo. Ajisüaka kibong kar aser pastor-bai lapokba orphanage nung tanur 20 shi jena moi lir.

"Baptist minister ka tepsetba aser Chin State kübok Thantlang tesem nung nürburtem aliba kitem bomb agi poksatsüba ya Myanmar nung junta sepaitemi anogoshia nürburtem nem timtem tulu agütsüba tatishitsü ka lir," ta Myanmar nung U.N. special rapporteur on human rights, Thomas

Andrews-i iba hopta Twitter ajanga ashi.

Military anemba shadow underground administration; National Unity Government-i September 7 nü sorkar anema nokdaksü sangdonga tawa tentetba Defence Forces (PDF) telungpurtem dang sorkar sepaitem aser parnok meyong kiojentem amaksü ayongzükba sülen Chin State amala tesemtem nung azütokshi tali kümogo.

PDF telungpurtemi hadir teperi bener aliba army amaksü merangba mapang aiben nürburtem teyongtsü nung mejepdaksür, aser iba ajanga nürburtem pei talidak ki toktsür jenshitsu kümogo.

Lokti lenir Salai Thang-i, kidanger yimtsüngtem aser India kübok Mizoram state nung jenoker aliba nürburtem atema kanga shisabulua bilemer, ta ashi.

"Item refugee tem ya chiyongtsü aser tejenokdak maliba ajanga timtem tulu nung lir," ta pai telephone ajang ashi.

Election inyakyim nung ochi mashi sendak lir, ta shia military-i Myanmar sorkar atsüngtokba sülen linük nung mepetmesü tulu adok aser tang tashi nung nürburtem aika tepsetogo.

Kasa mapang nung nürburtemi shimba lenir Aung San Suu Kyi-a military-i sota lir aser la anema ken o balala benoker tang okadak obendangba mapang ka lir.

### Jalalabad nung Taliban sepai 2 densema nisung 3 tepset

**Kabul, Rongjui/September 22 (Agencies):** Afghanistan kübok Jalalabad tesem nung Bodhbarnü Taliban sepai ana aser civilian ka ta tepsetogo, taa AFP sangdong ka ajanga metetdaksü.

Security source kati ashiba agi, mejangjaba nisung kari rickshaw ka nungi Jalalabad kübok Ghawchak district nung checkpoint ka amakba mapang iba tesem anasa alir asem tepset. Iba osang jangjashitsüba mapang Taliban ketdangsurtemi iba lendong nung parnok züngsem ka danga masü aser asür asemprongla ya civilian liasü, ta ashi.

Afghan sorkar yimsüsüba mapang Jalalabad province nung küm aika Islamic State's (IS) Afghanistan chapter, Islamic State-Khorasan (IS-K) inyaksangshia aruogo. Ajisüaka Bodhbarnü checkpost amakba

indang iba telok yagi nangzüka mali.

IS-K yagi ita ka tejkadng Kabul airport maka nisung 100 dak tema tepsetogo aser taoba hopta ishika mapashia tesem balala maka arudar.

IS-K aser Taliban naprongla Sunni telok dang lir, ajisüaka tamangba yimsü dak sendakba nung tebilemdangba balala aliba ajanga telok ana tsüngda aiben raraa arudar. IS-K-isa, hopta tatemi Jalalabad nung Taliban makogo. Iba telok yagi Honibarnü Jalalabad nung Taliban pur indang gari asem amakba aser Deobarnüa Taliba pur indang gari amakba nangzükogo.

Hamid Karzai International airport amakba ya US aser Taliban naprongla dak rangloker inyakba lir, ta US sorkari New York Times dang ashi.

### "China nunger phone tamshi": Lithuania



**Vilnius, Rongjui/September 22 (Agencies):** Lithuania defense ministry-i, China nunger indang mobile phone tem malitsü aser nürburtem dang parnoki tang amshia aliba China nunger phone tema intoktsü metetdaksüogo. Item phone tem nung built-in censorship capabilities aliba potetba sülen iba tetuyuba agütsü.

China nunger smartphone yangluba company tetsüti Xiaomi Corp-i Europe nung ayokba phone tem nung "Free Tibet", "Long live Taiwan independence" mesera "democracy movement" amala terms tem potettsü aser censor asütsü tashi lir, ta Lithuania indang state meyong cybersecurity body-i Mongolbarnü ashi.

European Union region atema Xiaomi indang Mi 10T 5G phone software capability shibangtsüogo, saka mashi mapang ka nung lapoktetsü, ta Defence Ministry indang National Cyber Security Centre-i ashi.

"Onoki China nunger phone malitsü aser takok tashi takaratiba nung tang alia aliba phone tema intoktsü ajungshir," ta Defence Deputy Minister Margiris Abukevicius-i osangbenertem dang ashi.


Iba dak sendakba nung Reuters-i osang jangjanüa ashishiba mapang Xiaomi-i

kecha telangzüba magütsü.

Lithuania aser China na tsüngda tesendaktep tawa mejungi kümogo. Taiwan-i Lithuania nung parnok indang mission dang Taiwanese Representative Office ta ajatsü ta sangdongba sülen China-i taoba ita Lithuania dang Beijing nungi parnok indang ambassador anintsü shiogo aser kasa mapang nung parnokia Vilnius nungi parnok indang ambassador meyipa anir arutsü ta shiogo.

Europe aser United States nung Taiwanese mission tem nungja yimti tenüng Taipei dang amshir aser asetkong tenüng mamshir, koba China-i parnok meyong ta ashir. US tir Joe Biden indang national security adviser Jake Sullivan-i Lithuania Ato Kilonser Ingrida Simonyte den taoba hopta sensak semogo aser China-i nongshiba mapang parnoki lar sorkar pusemstsü ta metetdaksüogo.

National Cyber Centre-isa, Xiaomi phone temi Singapore nung server ka dangi encrypted phone usage data yoker ta ashi. Huawei indang P40 5G phone nunga security tsütsü aibelen ngutetogo ajisüaka China nunger phone-sa OnePlus nungbo aibelen kecha mongutet. Baltics nung Huawei indang representative-i BNS news dang, parnok indang phone temi user's data meyoker ta ashi.



External Affairs Minister Dr. S. Jaishankar aser Republic of Korea Foreign Minister Chung Eui-yong na New York nung ajurutepba mapang tangokba noksa nung angur. Dena ajurutepba mapang linük ana tsüngda tesendaktepba indang onüka aika benoka sensaksemogo.

# Mindtree Foundation-i desktop 50 tenla agütsü

**Mon, Rongjui/September 22, 2021 (TYO):** District Administration Mon mapatong kübok, DC Mon, Thavaseelan K, IAS-i Hombarnü (21.09.2021) Wangkhao Government College (WGC) Mon nung Desktop 25 agütsüogo, ta sangdong ajanga metetdaksü.

Item Desktop ya Bengaluru kübok amenoka aliba Mindtree Foundation ajanga tenla ama aguja liasü. Shisaliok angazükba, mapa maongka tsütsü nungittsü aser ma ta m a b e n s a r / t a n g a r memenep alirtem atema sabang ka agütsütsü nükjidong yur Mindtree Foundation yagi inyaker.

Mindtree Foundation-i Mon District nung Desktop 50 shi tenla agütsü. Wangkhao Government College (WGC) Mon dak alia, tanüingba Desktop 25 shi District kübok Government School aser Health Unit (CHCs/PHCs) balala nung lema agütsüogo.

Mon District nung Government College rongnung Wangkhao Government College (WGC) kisüing asütsü aser 2021 atema National Assessment & Accreditation Council (NAAC) team puri iba College inyakyim asadangshitsü sentong lir. Tang, iba College nung Desktop 25 shi amenokba ajanga NAAC nungi grade'

tajung angutsü imlar.

Kaketshirtem nüngdakba ajiteta Desktop tenla agütsüba atema Mon DC-i Mindtree Foundation dang pelaba metetdaksü aser tarutsü nunga iba District nung 'education infrastructure' tsütsü renlokdaksüsa maneni nungittsü atema pai iba Foundation dang mepishiogo.

Iba sentong nung, Asst. Professor, N. Mongyung Phom menden liasü aser Principal WGC, I. Wati Imchen-i o jembi. IQAC atema Asst. Professor aser Coordinator, Shongya Konyak-i tepela anküp o jembia liasü, ta kasa sangdong nung shia lir.

# Jalukie nung Poshan Maah sentong ayongzüka agi

**Dimapur, Rongjui/September 22 (TYO):** Department of Social Welfare, Peren kübok ICDS Jalukie Project-i September 21 nü Block Level Poshan Panchayat sentong ka ayongzüka agiogo. Health aser nutrition dak sendakba nung tangazükba agütsütsü atema September ita tepeyong Poshan Maah sentong ayongzüka amungba nung shilem ka ama iba sentong ayongzüka agiogo. Iba sentong ya Women Welfare Conference Hall, Jalukie nung agia liasü.

Sentong nung o jembiba mapang EAC Jalukie, Wangan Phom-i, Panchayat shilem aser Centre sorkari amenoktsüba Poshan Schemes balala indang jembi. Pai, local lenirtem dang block level nung health aser nutrition dak sendakba nung tangazükba agütsütsü ajungshi. Wangan Phom-isa, COVID-19

tashidak den raratsü atema Vaccine agitsü nüngdakba indang lemsatop.

Sentong nungsa CDPO Jalukie, Namhuheing-i, Jan Andolan-People's Movement indang jembi aser council züingsem aser yimtsüing nung lenirtem dang health aser nutrition dak sendakba nung shilem agitsü aser tangazükba agütsütsü ayongzüka. Paisa, maparen balala takok ngua benoka inyaksü atema Panchayat shilem indang lemsatopa liasü.

Maneni Kalivi Zhimomi, Supervisor Jalukie-i, SAM, MAM (children) achaayangba yimya aser kinü tanurtem nem tetsü mama yongdaksüba den tanga chiyongtsü chidaksütsü koda tongtibang, iba indang lemsatop. Laisa, temang mapang shidak nung anepalua timtem lendong ajurutsü aliba nungi jenbotsü atema SAM

takaratika nung potettsüji kanga tongtiabang ta ashi.

Iba sentong ya District Project Asst. Peren, Mezilung Nchang lenisüba nung agi aser All Wards Chairman Jalukie Town tir Hauneu Zeliang-i tepela o jembia liasü.

# East Dimapur Ao Baptist Arogo Pastor Jongpong Imsong Ordain süogo



**Ordination Council Members:-**

Rev. A. Chuba Jamir, Chairman, Rev. C. Allem, Rev. I. Nochet, Rev. Talimeren Lkr. & Rev. Imnatemsu

Akümlü piyong Tsüingrem tenzüksü mulungtetsang Wb. Jongpong Imsong East Dimapur Ao Baptist Arogo nung küm 13 Pastor inyaka lia, Arogoi temulung süa ABAM dang asüingdangba ama mapang shitak nung Ordination Council shimtsür Pastor Wb. Jongpong Imsong Kibubar mapa asoshi bendanga yutsüba atema EDABA-i kanga pelar.

Tang nungi pa dang Rev. Jongpong Imsong ta ajatsü. Par kibong tenzüksüba wadang ano Tsüingremi tali moajang.

**Arogo tenüing nung,**  
Sd/- Wb. P. Alem Jamir  
Secy. Cum Cashier

# Kiphire nung senden ka amen

**Kiphire, Rongjui/Sept. 22, 2021 (TYO):** Bodhbarnü (22.09.2021), DC Conference Hall, Kiphire nung, 'Communitisation of public institutions & services Act 2002' asadangshitsü asoshi senden ka ayonga agiogo, kong Banuo Z. Jamir IAS (Rtd) chairman ama dena liasü, ta sangdong ajanga metetdaksü.

Iba senden nung, Banuo-i, tesüiba küm 19 - 20 nung 'Communitisation' mapatong koma achaayanga arur, ibaji metettsü nükjidong nung iba senden akar, kechiyong küm 20 dak tema iba dak sendakba nung

Sorkari kecha meinyaki aru, ta metetdaksü.

Pei pei tata tesem nung survey maparen takok ngua achaayangtsüsa, sector ajak nungi "performing aser non performing villages" shimtsü asoshi lai department ajak dang mepishiogo.

Banuo-i, line department ajak nem 'questionnaire design' lema agütsü aser; parnok dang tanaben asadangshitsü aser nübur o sorkar na tsüingda tesendaktep tajungba yanglutsü atema department indang pei tebilembatem ashitsü asoshi

mepishia liasü.

October 15, 2021 matongdang item questionnaire online ajanga reviewcomnact2002@gmail.com nung yoktsü asoshi lai department ajak dang tetuyuba agütsüogo.

Iba senden nung, T.Wati Aier DC Kiphire menden liasü aser seden nung Banuo Jamir den Communitization of public institutions & services Act 2002 asadangshitsü atema Member Secretary, John Lohe aser tanga ketdangsurtem denogo, ta kasa sangdong nung shia lir.

## ANTENATAL CARE

**Kechi südir süaka pezübenbo temang tendangtsüla, kong blood pressure, temang tozük tendangba aser Tetanus toxoid injection ana densema lir. Tanur MOZÜKIDANG asotsüla. Anema aliba tetsü kati dang anema aliba tanur sotettsü ta bilemtettsüla.**

**BALANCED DIET**

**IFA TABLET**

**IODISED SALT**

**TETANUS-VACCINE-**

Mashisa aliba tetsütemi parnok tenüing Anganwadi mesera Sub Health Centre nung züingoksemtsüla

**Issued in public interest by:**  
State Project Management Unit  
POSHAN ABHIYAAN, Nagaland, Kohima

## Boxing World Championships atema Shiva aser Sanjeet na qualify süogo

**Bellary, Rongjui/September 22, 2021 (Agencies):** India nung boxer, Shiva Thapa aser Sanjeet nati Bellary kübok ayongba Men's National Boxing Championships nung, Mongolbarnü pei pei tata category nung gold medal anguba sülen, taruba ita World Championships boxing asayamung nung shilem agitsü asoshi tenaprongla temsüa kümogo.

Kasa mapay, külem India nung boxer, Rohit Mor-ia 57kg category nung defending champion Mohammad Hussamuddin tsükdakja gold medal nguogo.

National boxing championships nung takok angur ajak, world championships atema qualify asütsü. World Championships ya October 24, 2021 nungi tenzüka November 6, 2021 tashi Belgrade, Serbia nung asayatsü.

Inspire Institute of Sports nung, külem India nung Deepak Kumar (51kg), Akash (54kg), Akash (67), Sumit (75kg), Sachin Kumar (80kg), Lakshya (86kg) aser Narendra (+92kg) nungeri pei pei tata final bout nung gold medal nguogo. Parnok ajak Services team nungi lir.

Parnok ajak dak alaka Shiva-i mezüing World Boxing Championships nung shilem agitsü terenemba lir.

Delhi nungi boxer Mor-i Commonwealth Games nung bronze medal angur Hussamuddin madak 5-0 agi takok angu. 57kg category nung, title takok angutsü asoshi Hussamuddin dak imlaa liasü.

Asian champion Sanjeet, shiba 'Services' tenüing nungi shilem agiogo, pai Haryana nung Naveen Kumar tsükdaktsü. "Unanimous decision" ajanga Sanjeet-i iba bout takok angu.

Assam nungi 'Season boxer', Shiva Thapa, shiba 2015 world championships nung bronze medal anguba den Asian asayamung nung pungoben medal ngua lir, 63.5kg category final nung pai ayong ayonga 5-0 agi Services nungi Dalveer Singh Tomar tsükdaktsü.

Karnataka indang Nishant Dev-ia iba championships nung maneni shilem tajung agia aruogo. 71kg category title atema pai Daman, Diu & Nagar Haveli indang Amit Kumar tsükdaktsü.

Deepak, shiba Asian championships nung silver medal angu, iba asayamung nung pai ajemalua aser shilem tajung agiba yong, pa nem "best boxer of the championships" naroküm agütsü.

Services puri team championship title atema meranga asayaogo. Iba asayamung nung parnoki gold 8,

silver 3 aser bronze 1 densema medal 12 angu.

Railway puri gold 2, bronze 2 aser silver 3 angu. Kasa asayamung nung, Delhi puri gold 1 den bronze 4 angu. Team anati tanabuba aser tasembuba jenjang ajangzüketet.

Railways atema Varinder Singh (60kg) aser Govind Sahani (48kg) nati gold medal angu. 2021 Asian Championships nung bronze medal angur Varinder-i Services' nungi Etash Khan Muhammed aser Govind-i Chandigarh indang Kuldeep Kumar tsükdaktsü.

Iba Championships, koba Covid-19 ajanga küm ka thina arur sülen asaya liasü. Iba asayamung nung, States/UT units & Boards 35 aser boxer 400 agi shilem agiogo.

National Boxing Championships indang category shia nungi gold aser silver medal angur ajak national coaching camp nung adentsü asoshi 'direct entry' angutsü. Ano, bronze medal angur anaprongla selection trail nung shilem agitsü, kong parnoki National Championships -- Services, Railways aser Haryana indang top-3 team nungi team tanabuba den külemi tokteptsü.

Iba national camp atema tanüingba tenüing ana ya selection trial' sülen September 24, 2021 nü sangdongtsü.

## IPL 2021: KL Rahul-i alizüing tasen ka tongtet



**Dubai, Rongjui/September 22, 2021 (Agencies):** Mongolbarnü, IPL asayamung nung, Punjab Kings puri tamakok angu yongjia, iba team captain KL Rahul-i IPL nung alizüing tasen ka tongtetogo.

Indian Premier League putiotsü nung takaratiba run 3,000 yanglur batsman rongnung aser India nung rongnung Rahul tanabuba kümogo.

Rahul, shiba innings 80 nung IPL runs 3,000 tongtet, iba alizüing tongteter rongnung Chris Gayle sülen pa tanabuba asütsü. Chris Gayle-i innings 75 nung run 3,000 tongteta liasü. IPL asayamung nung run 3000 tema yanglur batsman rongnung Rahul batsman 18buba nung liasü. Punjab Kings aser Rajasthan Royals na asayaba mapang, Rahul-i ball 33 nung run 49 yanglutet.

SunRisers Hyderabad nungi Australia nung batsman takotet, David Warner-i innings 94 nung kasa alizüing (runs 3,000) tongteta lir. Ano, India nung batsman Suresh Raina, shiba IPL nung Chennai Super Kings tenüing nungi asayar, pai innings 103 nung IPL runs 3,000 yangluteta lir.

Run 3,000 ajangtsü asoshi, Chetan Sakariya indang over tanabuba nung Rahul-i six' ana tashi atonga zükloksü. Iba asaya mapang, Rahul-i züketa yokba ball anüing tom nung alidang, 'gully' tsütsü Kartik Tyagi-i majepzükdang, Rahul-i zülöksütsüba ball asembe tashi Rajasthan Royals puri pupeta liasü.

Ajisüaka, mezüing innings nung Rajasthan Royals puri yangluba target' - run 186' shi meneptsü asoshi Rahul aser Mayank nati tatem tonga masayatetba yong Punjab Kings puri iba asaya run anati makok.

Tanabuba innings nung, Rahul den yaritepa Mayank-ia junga asaya liasü. Mayank-i 4' tenet aser 6' ana densema ball 43 nung run 67 yanglutet.

Asaya tetenzüklen, Rajasthan Royals opener Yashasvi Jaiswal-i Punjab Kings bowler tem den meranga asaya run 49 shi bendenloksü. Jaiswal-i yangluba run Rajasthan Royals pur atema kanga tongtibang liasü.

Rajasthan Royals pur innings tatemlen, Mahipal Lomror-i ball 17 nung run 43 yangluba ajanga, par team-i over 20 nung run 185 yanglutet.

## Simona Halep aser coach Cahill na pilaogo



**Rongjui/September 22, 2021.(Agencies):** Küm trok tashi tennis wadang tsütsü taoba mapang world no. 1 Simona Halep aser coach Darren Cahill na külemi inyaka aruba sülen, tena pilaogo.

Bodhbarnü, Romania tsür Halep-i iba osang sangokja liasü.

Australia nung Darren-i par kibong den külemi amungtsü asoshi pai Halep'er team metoktsüdang, pa tawabangba kübok arishi küm 29 tain Halep-i 2018 French

Open nung mezüing Grand Slam takok angu. Iba sülen, 2019 WTA Finals metenzükdang Darren aser Halep na tanaben longjema liasü.

Darren Cahill-i Halep indang coach inyak tenzüker mezüing küm asem nung, Halep-i season ana tashi world no. 1 nung tembang aser lai 2018 Australian Open final tongteta asaya.

"Küm trok tashi külemi inyaka arur sülen, @darren\_cahill den pilatsü

telemtetba agiogo. Asaya tsütsü aser shisatsü nung nungitta asayar tajung ka kümdaktsüba asoshi, Darren dang kanga pelar. Nü teyari ajanga tanü ni iba jenjang nung nokdakteta lir," ta Twitter sabang nung Halep-i lemsatet.

Halep, shiba tan ita tetenzüklen, US Open asayamung tetsür kija round pezübuba nung Elina Svitolina-i tsükdaktsü, taoba hopta Macedonia nung businessman Toni Iuruc den la kibong kümogo.

## Football asayar rongnung CR7-i sen timba aazüker

**Manchester, Rongjui/September 22, 2021 (Agencies):** Sen timba angur Manchester United nungi asayar Cristiano Ronaldo-i Lionel Messi ajatetogo, ta Forbes sangdong ajanga metetdaksü.

2021-22 season nung Ronaldo-i million dollar 125 shi aazüktsü asadangteter, koba Ronaldo Manchester United-i tanaben meyipa aruba atema pa ita sen aser bonus' nungi million dollar 70 shi angutsü.

Ano arishi küm 36 tain Ronaldo-i commercial deal' tem nungi million dollar 55 shi aazüktsü asadangteter. Tang, saisapong wadang balala nung tasayadak alir athlete asem agi commercial deal tsütsü sen timba ngua lir. Athlete asemji Roger Federer (\$90 million), LeBron James (\$65 million) aser Tiger Woods (\$60 million) asütsü.

Ronaldo-i Juventus toktsür Manchester United-i tanaben meyipa aru. Küm trok - 2003

nungi 2009 tashi pai United nung asayaogo. Portugal star Ronaldo-isa tawa international goal timba (tebur) idaktsüba yong otsü tasen yangluogo. Ronaldo-i Iran nung Ali Daei indang taoba record - goal 109 ajateta liasü.

Argentine nung Lionel Messi-i tan season nung million dollar 110 shi aazüktsü asadangteter. Parc des Princes nung ita sen aser bonus kisüing nungi Messi-i million dollar 75 angutsü, ta Forbes sangdong nung shia lir. Iba den külemi taoba mapang Barcelona nungi asayar Messi-i endorsement million dollar 35 shi angutsü asadangteter.

Barcelona toktsür sülen, Messi-i PSG nung aden. Alima nung sen timba angur asayar pungo rongnung tang, PSG nung arishi küm 29 tain Neymar densema asayar asem dena lir. Asayar pungo rongnung, Neymar (\$95 million) jenjang tasembuba aser arishi küm 22 tain Kylian Mbappe (\$43 million) jenjang pezübuba nung lir.

## BILEM DANGANG

"Teinyaktsü tulu süaka metitemi inyakra takok angur."